



2018 йил “ 6 ” декабрь

№ 239

2018 год “ ”

**Мактабгача таълим муассасаларининг Кузатув кенгашлари
фаолиятини ташкил қилиш ҳақида**

Ўзбекистон Республикаси Президентининг “Мактабгача таълим тизимини бошқаришни такомиллаштириш чора-тадбирлари тўғрисида” 2018 йил 30 сентябрдаги ПҚ-3955-сон қарорида мактабгача таълим муассасаларида амалдаги Васийлик кенгашларининг фаолиятини тугатиш ва уларнинг ўрнига Кузатув кенгашларини ташкил қилиш белгиланган.

Мазкур қарорнинг ижросини таъминлаш мақсадида, вазирлик томонидан Мактабгача таълим муассасасининг Кузатув кенгаши ҳақидаги намунавий Низом (келгусида Низом деб юритилади) ишлаб чиқилди ва вазирнинг 2018 йил 21 ноябрдаги 2-мқ-сон буйруғи билан тасдиқланди ҳамда Ўзбекистон Республикаси Адлия вазирлиги томонидан 2018 йил 3 декабрда 3094 рақам билан давлат рўйхатидан ўтказилди.

Мактабгача таълим муассасасининг Кузатув кенгаши (келгусида Кенгаш деб юритилади) фаолиятини ушбу Низом асосида ташкил қилиш бўйича биринчи йиғилишларни ўтказиш, унинг таркибини шакллантириш ва ўрнатилган тартибда расмийлаштирилишини таъминлаш мақсадида,

Б У Ю Р А М А Н:

1. Қорақалпоғистон Республикаси Мактабгача таълим вазири, вилоятлар ва Тошкент шаҳар мактабгача таълим бошқармалари бошлиқлари, туман (шаҳар) мактабгача таълим бўлимлари мудирлари билан биргаликда:

бир хафта муддатда:

мазкур Низом асосида ҳар бир муассасада Кузатув кенгаши Низомини ишлаб чиқилишини;

мактабгача таълим муассасаси тарбияланувчилари ота-оналари иштирокида йиғилиш ўтказиш ва Кенгашнинг мазмун моҳияти тўғрисида ота-оналарга тушунтириш ишларини олиб бориш;

икки hafta муддатда тизимдаги барча давлат мактабгача таълим муассасаларида Кенгаш фаолиятини ташкил қилишга оид биринчи йиғилишларни ўтказишни;

Кенгаш фаолияти билан боғлиқ амалга оширилган ишларни (шу жумладан биринчи йиғилиш, ота-оналар иштирокидаги йиғилишлар) оммавий ахборот воситалари орқали мунтазам равишда еритиб бориш;

Низомнинг 7-бандида белгиланган шахслардан иборат таркибда Кенгашни шакллантиришни;

Кенгаш фаолият юритиши учун зарур шарт-шароитлар яратишни (хона, канцелярия товарлари ажратиш, ҳужжатлар юритилиши ва сақланишини таъминлаш бўйича) таъминласинлар.



2. Қорақалпоғистон Республикаси Мактабгача таълим вазири, вилоятлар ва Тошкент шаҳар мактабгача таълим бошқармалари бошлиқлари, туман (шаҳар) мактабгача таълим бўлимлари мудирлари мазкур буйруқда белгиланган вазифаларни ўз вақтида ва сифатли бажарилиши учун шахсан жавобгар эканликлари таъкидлансин.

3. Назорат – таҳлил бошқармаси бошлиғи Л.Бердиева вазирнинг 2018 йил 21 ноябрдаги “Мактабгача таълим муассасасининг кузатув кенгаши ҳақидаги намунавий низомни тасдиқлаш тўғрисида” 2-мх-сон (рўйхат рақами 3094, 3 декабрь 2018 йил) буйруғини ва мазкур буйруқни жойларга электрон шаклда етказилишини таъминласин.

4. Мазкур буйруқнинг бажарилиши устидан назорат вазирнинг биринчи ўринбосари С.Турғунов имамсига юклансин.

Вазир  

А. Шин



ЎЗБЕКИСТОН RESPUBLIKASI МАКТАБГАЧА ТАЪЛИМ ВАЗИРИНИНГ БУЙРУҒИ


**Мактабгача таълим муассасасининг кузатув кенгаши
хақидаги намунавий низомни тасдиқлаш тўғрисида**

Ўзбекистон Республикаси Президентининг 2018 йил 30 сентябрдаги ПҚ–3955-сон “Мактабгача таълим тизимини бошқаришни такомиллаштириш чора-тадбирлари тўғрисида”ги қарорига мувофиқ буюраман:

1. Мактабгача таълим муассасасининг кузатув кенгаши хақидаги намунавий низом иловага мувофиқ тасдиқлансин.

2. Мазкур буйруқ расмий эълон қилинган кундан эътиборан кучга киради.

Вазир



А. Шин

Тошкент ш.,

2018 йил “11” ноябрь.

1-МХ -сон

Ўзбекистон Республикаси
мактабгача таълим вазирининг
2018 йил 21 ноябрдаги
2-мх-сон буйруғига
ИЛОВА

Мақтабгача таълим муассасасининг кузатув кенгаши ҳақидаги НАМУНАВИЙ НИЗОМ

Мазкур Низом Ўзбекистон Республикаси Президентининг 2018 йил 30 сентябрдаги ПҚ-3955-сон “Мақтабгача таълим тизимини бошқаришни такомиллаштириш чора-тадбирлари тўғрисида”ги қарорига мувофиқ мақтабгача таълим муассасаси Кузатув кенгашининг (бундан буён матнда Кенгаш деб юритилади) мақсади, вазифалари, ваколатлари ҳамда фаолиятини ташкил этиш тартибини белгилайди.

1-боб. Умумий қондалар

1. Мазкур Низом давлат мақтабгача таълим муассасаларига (бундан буён матнда муассаса деб юритилади) татбиқ этилади.

Мазкур Низом нодавлат мақтабгача таълим ташкилотлари учун тавсиявий хусусиятга эга.

2. Кенгаш юридик шахс ҳисобланмайди ва давлат рўйхатидан ўтказилмайди.

Кенгаш муассасани бошқаришда стратегик орган ҳисобланади.

3. Кенгашнинг асосий мақсадлари қуйидагилардан иборат:

муассасанинг устувор вазифаларини белгилаш;

мақтабгача таълим туман (шаҳар) бўлинмаси (бундан буён матнда ҳудудий бўлинма деб юритилади) томонидан тавсия этилган номзодлар таркибидан мақтабгача таълим муассасаси раҳбарини сайлаш;

муассасанинг мақсадлари ва вазифаларини ҳамда уларга эришиш режаларини тасдиқлаш;


муассасада амалга оширилиши белгиланган вазифаларнинг бажарилиши ва мақсадли кўрсаткичларга эришилиши устидан назорат олиб бориш.

4. Кенгаш ўз фаолиятини Ўзбекистон Республикасининг Конституцияси ва қонунлари, Ўзбекистон Республикаси Олий Мажлиси палаталарининг қарорлари, Ўзбекистон Республикаси Президентининг қарорлари, фармонлари ва фармойишлари, Ўзбекистон Республикаси Вазирлар Маҳкамасининг қарорлари ҳамда бошқа қонун ҳужжатлари, шунингдек муассасанинг Устави ҳамда мазкур Низом асосида амалга оширади.

2-боб. Кенгашнинг вазифалари

5. Кенгашнинг асосий вазифалари қуйидагилардан иборат:

ҳудудий бўлинма томонидан тавсия этилган номзодлар таркибидан муассаса раҳбарини сайлаш, шунингдек уни эгаллаб турган лавозимидан озод этиш ҳақида таклифлар киритиш;



муассасани ривожлантиришнинг устувор йўналишларини белгилаш;

муассаса фаолиятини такомиллаштириш, молиявий-хўжалик ҳолати, даромадлар ва харажатлар, бюджет ва бюджетдан ташқари ҳамда ҳомийлик маблағларидан фойдаланиш бўйича амалга оширилган ишлар тўғрисида муассаса раҳбарининг ҳисоботларини тинглаш;

муассасанинг йиллик молиявий режаларини, кўрсатилаётган пуллик хизматлар нархининг миқдорларини ва муассаса мулкидан фойдаланганлик учун ижара ҳақи миқдорини, шу жумладан аукциондаги бошланғич нархни муассаса раҳбарининг иштирокида танишиб чиқиш ва таклифлар бериш;

муассаса раҳбари, педагог ва бошқа ходимларининг фаолияти бўйича ижтимоий сўровлар ўтказиш;

муассасада тарбияланувчилар учун қулай шарт-шароитлар яратиш ҳамда уларни яхшилаш бўйича ота-оналар ва жамоатчилик ташкилотлари ва ҳомийлар билан ҳамкорлик қилишда амалий ёрдам кўрсатиш;

муассасани ривожлантиришга доир устувор йўналишларни белгилаш бўйича таълим муассасаси раҳбарининг дастур ва режалари юзасидан ҳудудий бўлинмага таклифлар киритиш;

муассасанинг ходимларини рағбатлантириш бўйича ҳудудий бўлинмага таклифлар бериш.

Кенгаш конун ҳужжатларига мувофиқ бошқа вазифаларни амалга ошириши мумкин.

3-боб. Кенгаш фаолиятини ташкил этиш ва таркибини шакллантириш

6. Муассасада болаларнинг сифатли таълим олишлари, уларга тегишли шарт-шароитлар яратиш ҳамда таълим-тарбия жараёнларини қўллаб-қувватлаш мақсадида муассаса раҳбарига кўмаклашиш учун ҳар бир муассасада Кенгаш ташкил этилади.

7. Кенгаш 11 кишидан кам бўлмаган тоқ сондан иборат таркибда тузилади. Бунда, Кенгаш таркибига муассасанинг педагоглари орасидан 2 нафар, тарбиячи ёрдамчилари орасидан 2 нафар, муассаса маъмуриятидан 1 нафар, тегишли ҳудудий бўлинмадан 1 нафар, жамоат ташкилотлари ва ҳомийлар орасидан 2 нафар ҳамда ҳар бир гуруҳида тарбияланувчиларнинг ота-оналаридан камида 3 нафар, аъзо киритилади.

Кенгаш аъзоларининг сони чекланмайди.

8. Кузатув кенгаши ҳар бир гуруҳдаги тарбияланувчиларнинг ота-оналари ёки уларнинг ўринини босувчи шахслар, педагоглар, тарбиячилар ёрдамчилари, мактабгача таълим муассасаси маъмурияти, ҳудудий бўлинма ходимлари орасидан шакллантирилади.

9. Кенгашнинг биринчи йиғилишида иштирок этаётган аъзолар умумий сонининг оддий кўпчилик очик овоз бериши орқали Кенгаш раиси ва котиби сайланади. Бунда, Кенгаш раиси ва котиби Кенгаш аъзоси ҳисобланган ота-оналар орасидан сайланади.

10. Кенгаш таркиби 3 йил муддатга сайланади. Бунда Кенгаш таркиби ҳар ўқув йили бошида кўриб чиқилиши мумкин.

11. Кенгаш аъзоларининг сайлашда муассасада тарбияланаётган болаларнинг ота-оналари ёки уларнинг ўрнини босувчи шахслар (улардан бири) иштирок этиши мумкин.

12. Кенгаш аъзолари муассаса тарбияланувчилари ота-оналарининг умумий йиғилишида очик овоз бериш йўли билан сайланади.

13. Кенгаш аъзоси этиб сайланган ота-оналарнинг фарзандлари муассасада тарбияланувчилар қаторидан чиқарилганда, кенгашнинг ушбу аъзоси кенгаш аъзолари қаторидан чиқарилади ва унинг ўрнига ота-оналар орасидан бошқа аъзо сайланади.

14. Муассаса маъмурияти ходимлари, педагоглар, тарбиячилар, тарбиячи ёрдамчилари Кенгашга яширин овоз бериш орқали сайланади ва муассаса педагогик кенгашининг қарори билан тасдиқланади.

15. Кенгаш аъзолигига ҳудудий бўлинма вакили тегишли туман (шаҳар) мактабгача таълим бўлимаси буйруғи билан тайинланади.

16. Муассасанинг раҳбари ёки унинг ўринбосарлари, шунингдек уларнинг яқин қариндошлари Кенгаш аъзолари сифатида сайланишига йўл қўйилмайди.

17. Кенгаш аъзоси Кенгашнинг йиғилишларида сурункали 3 марта узрли сабабларсиз иштирок этмаган тақдирда, у Кенгаш аъзолари таркибидан чиқарилади.

4-боб. Кенгаш йиғилишларини ташкил қилиш ва ўтказиш

18. Кенгашнинг биринчи йиғилиши муассаса раҳбари томонидан ташкиллаштирилади ва ўтказилади.

19. Кенгаш ҳар чоракда камида бир марта йиғилади.

20. Кенгаш йиғилиши баённома билан расмийлаштирилади.

21. Кенгаш йиғилишида унинг умумий аъзоларидан 60 фоизи иштирок этганда Кенгаш қарор қабул қилиши мумкин.

22. Кенгаш ўз фаолиятини дахлсизлик, ошкоралик, шаффофлилик, адолатлилик тамойилларига мувофиқ амалга оширади.

23. Кенгаш қарорлари аъзоларнинг тенг ҳуқуқлилиги асосида оддий кўпчилик овоз бериш йўли билан қабул қилинади. Овозлар тенг бўлган ҳолларда Кенгаш раисининг овози ҳал қилувчи ҳисобланади.

24. Кенгаш йиғилишларига Кенгаш раиси раислик қилади.

25. Кенгаш раиси ўз ваколатини вақтинча бажариш имконияти бўлмаган ҳолларда (хизмат сафари, таътил ва касаллик даврида), унинг вазифасини бажариш Кенгаш аъзоларидан бирига вақтинча юклатилади. Бунда, муассаса ва ҳудудий бўлинма ходимларига юклатилиши мумкин эмас.

26. Кенгаш йиғилишида муассаса раҳбари ёки унинг ўринбосарлари кузатувчи сифатида иштирок этиши мумкин.

27. Кенгаш йиғилишлари мазкур Низом талабларига мувофиқ ташкиллаштириши ва ўтказилиши ҳамда хужжатларнинг тўғри ва тўлиқ расмийлаштирилиши учун Кенгаш раиси масъул ҳисобланади.

28. Кенгаш йиғилиши ўтказилишидан камида 10 кун олдин йиғилиш ўтказиладиган кун, вақти, жойи ва муҳокама этиладиган масалалар ҳақида Кенгаш аъзолари хабардор қилиниши лозим. Кенгаш аъзоларини хабардор қилиш учун Кенгаш раиси масъул ҳисобланади.

29. Муассаса раҳбари Кенгаш йиғилишларини ўтказиш ва унинг ишини ташкил қилиш (хужжатларни расмийлаштириш ва сақлаш учун зарур бўлган хона, муассаса фаолияти билан боғлиқ маълумотлар ва канцелярия жиҳозлари) учун масъул ҳисобланади.

30. Кенгашнинг фаолияти бўйича маълумотларни ҳар чоракда муассасанинг расмий веб-сайтида, оммавий ахборот воситаларида ёки муассасанинг барча кўриши мумкин бўлган жойига жойлаштириш тавсия этилади.

31. Кенгаш йиғилишлари ўтказилганлиги ҳақидаги баённомалар Кенгаш йиғилиши ўтказилган кундан бошлаб 3 кундан кўп бўлмаган муддатда ҳудудий бўлинмага тақдим этилиши лозим.

5-боб. Кенгашнинг ҳуқуқ ва ваколатлари

32. Кенгаш ўзига юклатилган вазифаларни амалга оширишда қуйидаги ҳуқуқларга эга:

муассасанинг тегишли даврдаги фаолияти бўйича муассаса раҳбаридан маълумотлар сўраш ва олиш;

муассасанинг молиявий ҳисоботлари билан танишиш;

ҳомийлик ва хайрия маблағларининг кириш қилиниши ва сарфланиши ҳақидаги маълумотлар билан танишиш;

муассаса педагог ходимларининг шаъни, кадр-қиммати, обрўсини ҳимоя қилиш бўйича таклифлар киритиш.

6-боб. Яқуний қондалар

33. Кенгашнинг фаолиятига муассаса раҳбари, ҳудудий бўлинма, маҳаллий ҳокимликлар ва бошқа ташкилотларнинг аралашувига йўл қўйилмайди.

34. Муассасада тарбияланувчилар ва уларнинг ота-оналаридан турли хил сабаблар билан муассаса раҳбари, Кенгаш аъзолари ва бошқа ходимлари томонидан пул маблағларини йиғиш қатъиян тақиқланади.

35. Мазкур Низом талаблари бузилишида айбдор бўлган шахслар қонун хужжатларида белгиланган тартибда жавобгарликка тортилади.

36. Кенгаш раиси, қотиби ва аъзолари жамоатчилик асосида амалга оширадиган кузатув кенгашидаги фаолияти юзасидан интизомий жавобгарликка тортилиши мумкин эмас.

37. Мазкур низом Ўзбекистон Республикаси Бандлик ва меҳнат муносабатлари вазирлиги ҳамда Ўзбекистон Қасаба уюшмалари Федерацияси Кенгаши билан келишилган.